



Umhverfis- og auðlindaráðuneytið
Skuggasundi 1-3
101 Reykjavík

Sent í gegnum samráðsgátt

Borg, 4. febrúar 2021

Efni: Umsögn sveitarfélagsins Grímsnes- og Grafningshrepps um drög að breytingu á lögum vegna innleiðingar hringrásarhagkerfis.

Á fundi sveitarstjórnar Grímsnes- og Grafningshrepps þann 3. febrúar s.l. var tekið fyrir erindi frá Umhverfis- og auðlindaráðuneytinu þar sem óskað var eftir umsögn á drögum að breytingu á lögum vegna innleiðingar hringrásarhagkerfis. Eftirfarandi bókun var gerð:

12. Beiðni Umhverfis- og auðlindaráðuneytisins um umsögn á drögum að breytingu á lögum vegna innleiðingar hringrásarhagkerfis.

Fyrir liggur beiðni Umhverfis- og auðlindaráðuneytisins um umsögn á drögum að breytingu á lögum vegna innleiðingar hringrásarhagkerfis.

Í Grímsnes- og Grafningshreppi eru skráðir um 500 íbúar og tæplega 3000 frístundahús, sem reikna má með að hendi úrgangi í sveitarfélaginu. Sveitarstjórn hefur undanfarin ár unnið ötullega að aukinni flokkun fyrir íbúa og frístundahús í sveitarfélaginu, meðal annars með því að setja á laggirnar grenndarstöðvar víða í sveitarfélaginu þar sem boðið er upp á ítarlega flokkun á heimilisúrgangi.

Í 14. grein segir „Sveitarstjórnir bera ábyrgð á að tölulegum markmiðum sem sett eru um heimilisúrgang og lífrænan úrgang sé náð á þeirra svæði“.

Í 16. grein segir „Skýlt er að innheimta gjald sem næst raunkostnaði við viðkomandi þjónustu, svo sem með því að miða gjaldið við magn úrgangs, gerð úrgangs, losunartíðni, frágang úrgangs og aðra þætti sem áhrif hafa á kostnað við meðhöndlun úrgangs viðkomandi aðila“.

Sveitarstjórn gerir miklar athugasemdir við að í frumvarpinu sé ekki tekið tillit til þeirra sveitarfélaga þar sem frístundahús eru stór hluti af fasteignum. Taka verður tillit til þess að notkun slíkra húsa er ólík notkun íbúðarhúsa, og er þar af leiðandi hætt við því að erfiðara verði að uppfylla töluleg markmið. Rannsóknir sýna að flokkun er best ef hún er innan lóðar viðkomandi fasteignar, en almennt er ekki boðið upp á slíka þjónustu í frístundahúsahverfum. Þess í stað er stuðst við grenndarstöðvar eða gámasvæði, sem skila lakari flokkun heldur en flokkun innan lóðar, og flækja umtalsvert innheimtu gjalds miðað við notkun. Skoða þarf einnig tillöguna um innheimtu gjalds sem næst raunkostnaði út frá ofangreindum sjónarmiðum. Þrátt fyrir að sveitarstjórn sé fylgjandi þeirri stefnu að „þeir borgi sem hendi“ verður útfærsla á slíkri stefnubreytingu að liggja fyrir áður en hún verður fest í lög. Jafnframt gerir



GRÍMSNES- OG
GRAFNINGSHREPPUR

sveitarstjórn athugasemd við að í frumvarpinu sé lagt til að breyting á innheimtu gjalds eigi sér stað á miðju ári.

Í greinagerðinni með drögunum að breytingu á lögnum er farið yfir mat á áhrifum á hverri grein og þar er talað um að ráðuneytið ráðgeri að setja af stað vinnu við gerð leiðbeininga til sveitarfélaga um möguleika við útfærslu á breyttri innheimtu í samráði við Samband íslenskra sveitarfélaga. Sveitarstjórn Grímsnes- og Grafningshrepps vill hér með bjóða fram fulltrúa frá sveitarfélaginu í þessa vinnu og telur að þar sem stærsta frístundabyggð landsins sé í sveitarfélaginu sé fulltrúi sveitarfélagsins vel til þess fallinn að koma með punkta inn í þessa umræðu.

Virðingarfyllst,
f.h. sveitarstjórnar



ODDVITI
GRÍMSNES- OG
GRAFNINGSHREPPS

Ása Valdís Árnadóttir

Ása Valdís Árnadóttir, oddviti